

# BAQOBALEKGETHO BA TUMMENG

## Lionel Messi

Naledi ena ya bolo ya Barcelona FC le Argentina Lionel Messi le ntatae Jorge Horacio ba ile ba lefa tjelele e kana ka €10 million bakeng sa makgetho a morao ho leka ho qoba diqoso tsa ho balehela tefo ya lekgetho. Bobedi bona bo ile ba laelwa ho hlahella lekgotleng le haufi le Barcelona ka Loetse 2013, mabapi le makgetho a kolotwang a lekeno la ditokelo tsa ditshwantsho ka 2010 le 2011. Ebang ba ka fumanwa ba le molato, ba ka lahlelwa tjhankaneng nako e kana ka dilemo tse tshelela.

## Dolce and Gabbana

Bathehi ba leibole e tummeng lefatshe ka bophara ya Dolce & Gabbana, Domenico Dolce le Stefano Gabbana ba ile ba fumanwa ba le molato wa ho qoba tefo ya lekgetho ke lekgotla la Milan ka Phuptjane 2013. Batjhotjhisi ba supile hore borafeshene bana ba hlolehile ho tshebahatsa tjelele e kana ka €200 million ka nako eo mapetjo a ka sehlohong a khampani ena a neng a rekisetswa khampani e leng ko Luxembourg.

Dolce le Gabbana ba ile ba fumanthwa kotlo ya selemo se le seng le dikgwedi tse robedi tjhankaneng e ileng ya fanyehwa mme ba laelwa ho lefa kotlo ya tjelele e kana ka €500 000 ho tsamaiso ya lekgetho ya Italy.

Dinyeweng tse ding tse fapaneng mane Italy, ka 2000 sebini se seng se hlokaletse Luciano Pavarotti se lefile tjelele e fetang \$12 million ya makgetho a morao, ha mampondi wa mehleng wa mabelo a dikoloi Valentino Rossi a ile a dumela ho lefa akgente ya lekgetho ya hona moo Italy tjelele e kana ka \$51 million ka 2008.

## Lauryn Hill

Ka Motsheanong 2013 setho se tummeng sa sehlopha sa mmimo sa Fugees se ileng sa hapa kgau ya Grammy ka albamo ya hae ya mantlha e bitswang The Miseducation of Lauryn Hill o ile a lahlelwa tjhankaneng nako ya dikgwedi tse tharo mme dikgwedi tse latelang tse tharo a tlameha ho dula lapeng ka lebaka la ho hloleha ho lefa makgetho a fetang \$2 million a dikuno tsa hae tsa nako ya dilemo tse hlano. O ile a iphumana a le molato diqosong tseo tsa 2012. Ka kakaretso, batjhotjhisi ba boletse hore Hill o fumane tjelele e ka bang \$2.3 million dilemong tsena tse hlano mme o ne a na le sekoloto sa lekgetho sa \$1,006,517. O ile a bolella lekgotla hore haesale a ikemiseditse ho lefa makgetho a hae empa o ile a hloleha ho etsa jwalo ka ha mosebetsi wa hae wa ho ba sebini o ile wa nyopa.

## Wesley Snipes

Ka la 2 Mmesa 2013 sebakadi sa kalaneng, mohlahisi wa difilimi le setsebi sa tsa karate Wesley Snipes o ile a lokollwa tjhankaneng ka mora dilemo tse ka bang tharo ka lebaka la ho hloleha ho nehelana ka dikgutliso tsa lekgetho la lekeno. Snipes o ile a fumanwa a le molato bakeng sa diphoso tse nnyane tsa ho hloleha ho faela dikgutliso tsa lekgetho ka 2008. Pakeng tsa 1999 le 2001, Snipes o ile a qoba ho lefa makgetho a tjelele e kana ka \$7 million. A mang a mabaka a sethathong a Snipes e bile hore o ne a tshepetse dikeletsong tsa baeletsi ba hae ba lekgetho e leng Eddie Ray Kahn le Douglas P. Rosile. Le bona ba ile ba fumanwa ba le molato ke lona lekgotla leo bakeng sa boqhekanyetsi ba lekgetho mme bobedi ba ile ba fumana dikotlo tsa ho hlola tjhankaneng nako e teletsana ho feta ya Snipes.

## Leona Helmsley

Moruihadi enwa wa dihotele ho bolelwa hore o kile a re "Ha re lefe makgetho. Ke batho ba bannyane feela ba lefang makgetho." Moahlodi o ile a laela hore ho dula ha hae tjhankaneng ho qale ka la 15 Mmesa e leng Letsatsi la Lekgetho mane USA.

## Al Capone

Ha ba ka ba kgona ho qosetsa Mong. Capone diketsahalolo tsa kgwebo e seng molaong empa ho qoba ha hae ho lefa lekgetho ebile taba e ileng ya mo diha.

## Ulrich Hoeness

Ulrich Hoeness, mokaubere wa bolo naheng ya Germany eo hape e neng e le mopresidente wa sehlopha sa bolo sa Bayern Munich o ile a lahlelwa tjhankaneng nako ya dilemo tse tharo le halofo ka mora ho fumanwa molato wa boqhekanyetsi ba lekgetho lekgotleng la Germany ka la 13 Tlhakubele 2014. Hoeness o ile a qhekanyetsa mmuso wa Germany tjelele e kana ka 27m Euros ya makgetho a sa leshwang. O boletse hore a ke ke a ipiletsa kgahlano le kahlolo ena mme o ile a itokolla maamong a hae jwalo ka mopresidente le ho ba modulasetulo wa sehlopha sa bolo.